

## 每週經課朗誦經文(巴克禮台語漢字)2013/02/24

### 共同經課 - 1 創世記十五章一節~十二節，十七節~十八節

1 諸個代誌了後，耶和華的話佇異象中臨到亞伯蘭講：「亞伯蘭啊，你毋免驚！我是你的盾牌，是你極大的報賞。」2 亞伯蘭講：「主耶和華啊！你欲互我甚麼？我已經無子，承接我的家業的就是大馬色人以利以謝。」3 亞伯蘭閣講：「你無互我有後裔；彼個生佇我家內的是我的後嗣。」4 耶和華閣臨到給伊講：「此人毋是欲做你的後嗣；對你本身出的才是做你的後嗣。」5 就導伊出去外面，講：「你看天，算許個星，你算會了抑袂？」閣對伊講：「你的後裔亦欲親像按呢。」6 亞伯蘭信耶和華，伊就給伊算做義。7 閣對伊講：「我是耶和華，曾導你出迦勒底的珥城，為著欲將此個地互你做業。」8 亞伯蘭講：「主耶和華啊，我怎樣會知欲得著此個地做業啊？」9 伊給伊講：「你給我取一隻三年母的牛，一隻三年母的山羊，一隻三年公的綿羊，一隻鳩雛，一隻鴿仔。」10 伊就取諸個物來，逐樣對中破開做二旁，此旁及彼旁排相對，只有鳥無破開。11 有鷹鳥落來，佇死的精牲的頂面，亞伯蘭就趕伊去。12 日欲落的時，亞伯蘭暈重眠；忽然有真黑暗的大驚惶到佇伊。17 日落天暗，有出煙的爐及喲 的火把對許個破旁的肉經過。18 當彼日，耶和華及亞伯蘭立約，講：「我有將此個地，對埃及河到彼個大河，就是伯拉河，互你的後裔。」

### 共同經課 - 2 詩篇二十七篇

1 〔大衛的詩。〕耶和華是我的光，是我的拯救，我欲驚是誰？耶和華是我活命的氣力，我欲驚是誰？2 許個做歹的人就是我的仇讎，我的對敵來攻擊我，欲食我的肉，彼時In就著觸跋倒。3 雖然有軍兵紮營欲攻擊我，我的心亦無驚惶；雖然興起刀兵攻擊我，我猶原自在。4 有一項事，我曾對耶和華求，我猶原致意愛得著；就是一世人倚起耶和華的盾，看伊的榮光，數念伊的殿。5 因為患難的日，伊欲暗靜保護我；佇伊的帳帷內，將我園佇伊布棚蓋密的所在，舉起我佇石磐頂。6 今我的頭殼得著抬起，卡高佇我四面的對敵。我欲佇伊的布棚獻歡喜的祭；我欲吟詩亦欲唱歌謳唵耶和華。7 耶和華啊，我出聲求叫的時，求你聽；閣求你憐憫我，應我。8 你曾講：恁著欣慕見我的面。彼時我的心對你講：耶和華啊，我欲欣慕見你的面。9 毋通對我掩你的面。毋通受氣來趕你的奴僕，你平素是做我的幫助。救我的上帝啊，毋通放揀我，亦毋通離開我。10 因為父母離開我，耶和華欲收留我。11 耶和華啊，求你用你的道路指示我，因為我的對敵的緣故導我佇平坦的路。12 毋通將我交互對敵，成in的心願；因為濫糝干證的人，起來攻擊我，in亦吐出兇惡的話。13 我若毋信佇活人的地得著看見耶和華的恩惠，就的確絕望。14 著聽候耶和華！著勇壯，你的心著堅固！實在著聽候耶和華！

### 共同經課 - 3 腓立比書三章十七節~四章一節

17 兄弟啊，恁著相及學我，恁有阮做模樣，就著致意看許個照按呢行的。18 因為有多多人行代誌是我曾查查給恁講，今也流目屎給恁講的，in就是基督十字架的對敵；19 in的結局是沈淪；in的上帝是in的腹肚。in的榮光是佇in的見誚，in所致志是地上的事。20 因為咱是天頂的國民，也向望拯救者對遐來，就是主耶穌基督。21 伊既然有權能會互萬物降服伊本身，就欲用彼個權能來變換咱卑賤的身軀，及伊榮光的身軀同款。1 所以我所疼、所欣慕的兄弟，做我的歡喜，做我的冕旒的。所疼的啊，著按呢倚在佇主。

### 共同經課 - 4 路加福音十三章三十一節~三十五節

31 彼時，有法利賽幾若人來給伊講：「你著離開遮去別位，因為希律愛欲削你。」32 伊給in講：「恁去給彼隻狐狸講：『你看，今仔日、明仔日我趕鬼醫病，到第三日我就完全。』」33 雖然按呢，今仔日、明仔日、及後日，我應該著行，因為不該有先知受害死佇耶路撒冷的外面。34 耶路撒冷啊！耶路撒冷啊！就是削死先知人，用石頭擲奉差到佇伊的。我佻多擺愛聚集你的子兒，親像雞母聚集伊的雞仔佇翅下；若是恁毋愛。35 你看，恁的厝放喲互恁。閣我給恁講，恁決斷袂看見我，聽候恁講：『佇主的名來的得著福氣。』」